



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

**Neymar internationa football
asaya nungi anisüngzüker**

**Khamenei asüpila sentong nung
mangyimer-i mang ayangtsü ayimten**



VOL. XXIII ISSUE NO. 264 (ADOK 264) DIMAPUR SANGTENNÜ (TUESDAY) CHITENI (JULY) 07, 2026

₹ 5.00

FNTA atema NLA Special Session alitsü

Dimapur, July 6, 2026 (TYO): Nagaland State Cabinet-i Frontier Nagaland Territorial Authority (FNTA) atema Nagaland Legislative Assembly indang Special Session ka jazüka amentsü osang metetdaksüogo.

Iba nung ajemdaker sorkari Eastern Nagaland People's Organisation (ENPO) dang July 10, 2026 nü Public Rally agitsü aser Eastern Nagaland district ajunga mokdangtsü lemtetba meyipa reprangshitsü mepishiogo.

State sorkari iba onük asoshi süoki ia bilema inyaka arudar aser July 6, 2026 nü State Cabinet-i Eastern Nagaland Legislators' Union (ENLU) züngsemtem aser State sorkar tongti ketdangsürtem den rongdak senden ka ayonga menogo.

Iba senden nung State sorkari FNTA atema Special Session ka jazüka amentsü lemtet. Iba session nung FNTA tentettsü atema ozüng latettsü. Iba ya Ministry of Home Affairs, Government of India den asüngdangtepa temelaba ngur aser Constitution den putepa

latettsü ta Home Department, GoN-i sangdong ka nung ashi.

Iba maparen inyakdang State sorkari Constitution of India nung Arrla 371(A) nung mekongshitsü mesüra memelenshi ta metetdaksüogo.

India sorkari ENPO areas renlochtsü Rs 5,000 crore economic package agütsütsü ta nangzükogo saka state sorkari economic package ya tajemba agi Rs 10,000 crore bosa agütsütsüla ta mepishiogo.

State Cabinet-i lemtet agibatem ya India sorkar dangi abentsü aser Chief Minister-i anir ENLU züngsemtem dena Cabinet teshimtet telok ka New Delhi-i oa India sorkar dang nungi tebilemba, temelaba aser shisatsü meshitsü ta Home Department-isa ashi.

February 5, 2026 nü India sorkar, Nagaland sorkar aser Eastern Nagaland Peoples' Organization (ENPO) tsünga Frontier Nagaland Territorial Authority (FNTA) tentettsü atema Memorandum of Agreement (MoA) sign sütepa liasü.

Benjamin Yephthomi-i B.L. Santhosh den ajurutepe

Dimapur, July 6, 2026 (Agencies): July 6, 2026 nü BJP Nagaland State President Benjamin Yephthomi-i BJP National General Secretary B.L. Santhosh den ajurutepogo.

BJP Headquarters, New Delhi nung tena ajurutepdang Yephthomi-i Santhosh lenisüba tajung atema tenüngsang agütsü.

Santhosh-i karyakarta shia dang nungi tebilemba angadanger aser telok tali tajungba akümtsü aser tashi aittsü atema bendanga agüja inyaker. Iba ajanga linük ajungalen party züngsemtemi pa kanga sakloker ta Yephthomi-i ashi.

Santhosh-i tebu ka ama len anir aser pa lenisüba ajanga

karyakartas tali bendanga agütsüshir inyaktsü ajungmesor ta paisa shisem.

Iba senden nung Nagaland nung BJP tashi itshitsü, nütsüng renloka aotsü aser ulushitsüba asoshi jembiogo.

Santhosh-i alizüng tejangja ayuba, kanga junga len aniba aser teti ajungshiba ajanga Nagaland nung party tali tashi ishitsü aser nübor taginübatem tonga inyaktettsü ta Yephthomi-isa ashi.

BJP Nagaland-i Prime Minister Shri Narendra Modi lenisüba kübok Nagaland tashi taitba akümtsü, renlochtsü aser azükarutsü atema inyakba nung Santhosh lenisüba ajanga ajungmesor ta paisa shisem.

Manipur nung Assam Rifles sepai 2 khaset

Imphal, July 6, 2026 (Agencies): Ukhrul district kübok Nungshang Kong (Lungshang River) anasa telungpurtemi amakdang 40 Assam Rifles sepai ana khaset.

July 6, 2026 nikongdang 3:50 ako meta sepaitemji 40 Assam Rifles' Shangshak Battalion headquarters-i meyipa aodang lendong ajuru. Iba tesem ya Ukhrul district headquarters nungi kilometre 17 shi pilar lir.

Iba lendong nung asürtemji Warrant Officer Balwant Singh aser Havildar C.M. Singh (driver) ta jangjaogo aser iba tatalokba sülen security forces-i search operation tulu ka tenzükogo.

Telungpurtem amakdang sepaitemi meyiper khateptsü tenzük aser ghonda ana jungnüa injang yoktepa osang angazüker.

Iba lendong nung yirurtemji mezüngbo Imphal nung advanced medical treatment atema anir aotsü merang saka temang tamajungba akümba agi Sangshak, Ukhrul district nung aliba Assam Rifles camp-i anir ao saka idakji tenaprong asü ta osang angazüker.

Iba mapa inyakertem metettsü atema security forces-i search operation ka tenzükogo aser tang tashi nung nisungtem maitsü memetet lir.

Hamas-i küm 20 yimsü süa arur Gaza Governing Body loksar

New Delhi, July 6, 2026 (Agencies): July 6, 2026 nü Palestinian Islamist movement Hamas-i küm metsü jungnüa Gaza Strip madak yimsü süa aruba telok loksaba metetdaksüogo aser iba ajanga civilian rule tenzüktsü asoshi technocratic committee ka tentettsü lenmang lapoktsüogo.

2007 küm Hamas-i Palestinian movement Fatah ket nungi tashi rakzükba sülen Gaza madak yimsü süa aru. Yaküm October ita Hamas aser Israel tsünga ceasefire tenangzüktep ka agiba sülen Hamas-i Gaza ketdangsübaren toktsütsü renema lir ta aiben shiogo saka parnok disarmament asütsüba onük metembangtet lir.

"Sorkar indang emergency

committee tekolak Mohammed al-Farra-i mapa nungi anenogo" ta Hamas government media office tanishir Ismail al-Thawabta-i ashi.

"National Committee for the Administration of Gaza (NCAG) nem ketdangsübaren tashi agütsütsü atema paisa committee loksago" ta Ismail-i ashi.

NCAG ya tang Cairo nung amenoka lir aser October 2025 nung US President Donald Trump-i ceasefire alitsü jembitepa sülen akümba Board of Peace ajanga NCAG tenteta liasü.

"Hamas-i mera tasen ka agiogo aser joko Gaza Strip madak yimsü masütsü. Gaza atsünga aginürtemi nübortem samatsütsü meranga inyaka arur

aser parnok nem tatemtsü kecha magütsütsü asoshi iba lemtet agiogo" ta Hamas spokesman Hazem Qassem-ia ashi.

National Committee for the Administration of Gaza-i maparen inyaka aotsü renema lir ta committee tekolak Ali Shaath-ia metetdaksüogo.

Board of Peace-i Hamas sangdong agizükogo aser Gaza nung prangpong ajak NCAG küboki aittsü metetdaksüogo.

"Tongtipang tangatetbaji one authority, one law aser one weapon lir" ta parnoki ashi.

"Comprehensive Gaza Peace Plan aser United Nations Security Council Resolution 2802 nung lateta aliba ama NCAG kübok prangpong ajak aittsüla" ta Board of Peace-isa metetdaksü.

Delhi school ajak nung Child Protection Committee tentettsü

New Delhi, July 6, 2026 (Agencies): Delhi nung Protection of Children from Sexual Offences (POCSO) Act kübok tanurtem kümzüka ayutsü meranga Delhi sorkari school ajak nung tan July tatemlen tashi nung Child Protection Committee tentettsü tetuyuba agütsüogo.

Delhi Lieutenant Governor Taranjit Singh Sandhu aser Chief Minister Rekha Gupta nati Child Protection Month maparen meyipa reprangshidang iba lemtet agi.

Iba campaign agidang child safety measures tenzükba ya school aser reju ajak nung teti atema benschia aotsüla ta sorkarisa tetuyuba agütsü.

Delhi government schools nungbo Child Protection Committees tentetogo. Tanüngba government-aided, MCD, NDMC, Delhi Cantonment Board aser private schools nung tan

July ita tatemlen tashi nung Child Protection Committees tentettsü tetuyuba agütsür ta ketdangsürtemi ashi.

Iba ya linük yimtiba nung school 5,633 dang tuyur ta parnokisa ashi.

National Commission for Protection of Child Rights (NCPCR), Delhi Commission for Protection of Child Rights (DCPCR) aser POCSO Act ajanga lateta aliba ama school temi student safety checklists inyakttsüla ta parnokisa ashi.

Sorkarisa teachers, staff aser master trainers nem POCSO training agütsütsü, POCSO ken o tem reprangtsü asoshi Standard Operating Procedure (SOP) tenzüktsü, student safety checklists atema compliance certificates agütsütsü, self-defence training maneni agitsü aser children with special needs atema safety measures

akangshitsü tetuyuba agütsüogo.

Educational and Vocational Guidance Counsellors (EVGCs) 1,000 shi kati tang Delhi government schools nung awareness sessions agidar.

Ketdangsürtemi Delhi nung school shia nung ibala counselors ayutsü tetuyuba agütsüogo.

Child Protection Month mapang school temi parent-teacher meetings (PTMs), audio-visual campaigns aser printed material ajanga awareness drives agitsü metetdaksüogo.

Delhi sorkari July ita ya Child Protection Month asütsü sangdonga liasü. Iba asoshi Education Department, Delhi Police aser Women and Child Development Department dang awareness campaigns, school inspections, POCSO compliance aser yimtiba ajungalen child safety systems akangshitsü asoshi mapa lemozükja lir.

CNCCI-i DCCI pusema nungiter; NSF aser sorkar ajungshir

Dimapur, July 6, 2026 (TYO): Dimapur Chamber of Commerce & Industry (DCCI) ajanga Dimapur nung shishilembartem kümzüka ayutsü asoshi mapa balala inyaka aruba atema tenüngsang agütsür ta Confederation of Nagaland Chamber of Commerce and Industry (CNCCI)-i metetdaksüogo.

Talisa Prysm Lounge, Dimapur nung NSF Finance Secretary densema atalokba nung DCCI Grievance Cell-i mapang shitak nung inyakba asoshi pelar ta Media Cell, CNCCI-i sangdong ka nung ashi.

Kaketshir lennirtemi Prysm kibur den mangatetep kar ali asüyonga ozüng amer ama inyaksangshiba aitsür kechiyong ibaji ozüng amertem teinyaktsü lir ta parnoki ashi.

Külen, DNSU-i DCCI dang

"third party" ta ajaba atema tebilemtsü abener. Iba ya Dimapur district sasep nung shishilembaba dak sendakba onük ka lir anungji DCCI tebang aitsü temeten lir. Iba ajanga civil society organisations aser representative bodies indang teinyaktsü mangatetba sayur ta CNCCI-isa metetdaksü.

NLTP Act liaka restaurants, bars, pubs aser lounges 30 tema lapoka aliba atema tasüngdangbatem adoker aser iba ya parnok meeting resolution nung sayua lir. Iba ajanga Act mapa shitak meinyakba kuli agütsür aser State sorkari koma inyaker ta tasüngdangba arur, anungji item ozüngi memelaba tesemtem tangsa shibangtsüla ta CNCCI-isa takhangba agütsüogo.

Dimapur Restaurant Union ya Government-registered body ka süra aser NLTP Act anema

inyakba putetra bangdakpurtemi registration meyipa reprangshitsüla aser ozüngi melaba ama tapet mapa inyakttsüla aser registration agentsüla ta CNCCI-isa metetdaksüogo.

Naga public-i NSF ya kanga akhümketa züngshir anungji tarutsü nung ibala mesükba tatalokba malitsüsa inyakym akangshiba indang yimjak nung sangdongtsüla. Iba osang jangjatsüba ajanga public-i NSF dak temulung tali alemtsü ta parnokisa ashi.

Tatamsa, State sorkari NLTP Act atema kechi tangatetba nung noktaka lir osang tejangja metetdaksütsü tim. Iba Act agizüker küm 30 tema süia arur anungji akangkanga inyakttsüla mesüra tim legal reforms tenzüktsüla ta Media Affairs, CNCCI-isa metetdaksüogo.

Nagaland Angh-i Dept. of WRD den senden amen



Nagaland Angh Nand Kishore Yadav den Department of Women Resource Development, Nagaland nungi ketdangsürtem July 6, 2026 nü Lok Bhavan, Kohima nung senden ka amendang tangokba noksa nung angur.

Dimapur, Chiteni/July 06 (TYO): Nagaland Angh Nand Kishore Yadav mendenpuba sür July 6, 2026 nü Lok Bhavan, Kohima nung Department of Women Resource Development den senden ka mena liasü.

Iba mapang Angh Yadav-i Transformative Livelihood Intervention (TLI) Project, Protection and Promotion of Tribal Designs, Myki activities, Multi Training Centre, Integrated Development-cum-Resource Centre (IDRC), District Resource and Development Programme (DRDP) aser entrepreneurship aser skill development maparen densema Nagaland tesem balala nung tetsürtem ajangzüksü sentong

Department ajanga inyakba reprangshima liasü.

Department-i Angh dang Naga Heritage Village, Kisama nung Myki Hub amenoktsü sentong aliba indanga lemsatep, koba tetsür entrepreneurs, artisans aser aluyimer atema teti atema market avenues agütsütsü aser kasa mapang akhi tejen oset aser tanü-asüng yangluba oset ajungkettsü nükjidong nung lir. Iba project ya Chief Minister's Innovative Programme Fund kübok yarir aser November 2026 tashinung renemtsü imlar.

Senden nung ano Special Assistance to States for Capital Investment (SASCI) inyakyim kübok district balala nung Working Women hostels yangluba indangb osangtem

agitep aser women resources centres ulushitsü merangba, tetsür entrepreneurs atema senotsü arutsü lenmang tajungba kumtsüba aser market tesendaktep ulushiba indanga reprangshima liasü.

Department-i senotsü aser nübu peria maliba tebilemstü lemsatep aser state tesem ajungalen tetsür rongsenketzüng tajungba kumdaktsütsü nükjidong nung sentongtem timba aser tuluba kumdaktsüba nung tali yaritsü nüngdakba indanga lemsatepa liasü.

Angh-i Department dang tetsür asoshi sentong balala inyakba atema pelaba lemsatep aser tanga departments aser stakeholders den lungjemer maneni inyaktsü ajungshia liasü.

NU nung FYUGP B.Sc. Honours agütsür



Nagaland University, Lumami Campus anünglen nungi tangokba noksa ka yangi angur.

Dimapur, Chiteni/July 06 (TYO): Nagaland University-i CUET-UG 2026 ajanga 2026-27 academic session atema Four-Year Undergraduate Programme (FYUGP) in Bachelor of Science (B.Sc.) nung admission asoshi applications meshir.

Admission ya National Education Policy (NEP) 2020 framework nung shia aliba ama University indang Multi-Disciplinary Research Centre (MDRC) ajanga agütsü.

Iba Undergraduate programme nung kaketshir temi science disciplines pongu - Botany, Chemistry, Mathematics, Physics aser Zoology nung Honours aser Honours den Research programme agütsü maongka agütsür.

Admission ya candidate indang CUET-UG scores aser Class XII examination performance nung ajemdaker agütsütsü. Item course agütsü jangra alirtemi University indang admission portal <https://admission.nagalanduniversity.ac.in> ajanga application agütsütsü akok.

Online application ya July 1 nungi July 15, 2026 tashi agütsütsü aser University-i shirtlosted candidates tenüng July 16, 2026 nü sangdongtsü aser shimtetba candidates tem admission ya July 17-20, 2026 anogotem agütsü. Waiting list nungi admission ya July 21-23, 2026 anogotem agitettsü.

Applicants temi tawa tangokba passport-size noksa ka den meyongnem, Class X admit card and marksheet, Class XII

admit card and marksheet, CUET scorecard, transfer certificate aser caste, disability, backward tribe mesüra gap certificate amala nüngdakba document agütsütsüla.

Seat allocation ya Scheduled Tribe (ST), Scheduled Caste (SC), Other Backward Classes (OBC), Persons with Disabilities (PwD), Economically Weaker Sections (EWS), Sports Quota, Employees' Quota, aser Unreserved (UR) densema Nagaland University inyakyim nung alitsü.

Admission dak sendakba nung osang tejangjaba metetner temi Multi-Disciplinary Research Centre den +91 9170707089 mesüra mdrc@nagalanduniversity.ac.in ajanga tongteprateptsü akok.

NSCN/GPRN-i Tulini benjong salem lemsatep

Dimapur, Chiteni/July 06 (TYO): Sumi kin nungi adianu aser adianutsür ajunga dangi tepela Tulini benjong salem abener, ta NSCN/GPRN sangdong ka ajanga ashi.

Tulini ya tenüngsang agütsüba, temba-tinu aser nüburtem takum benjong ka lir. Iba benjong nungya asen otsüla-oboula nunger mapang nungi telungjem aliba, kati ka dak tamang akaba, meranga inyakba aser sobaliba asüngteta amshia aruba keta lir. Putu aika item yimya yagi asen nüburtem takum süa lidaktsü aser asen lokti tashi itdaktsü, ta ashi.

Asenoki iba benjong amungdang ano asen sobaliba wazüka ayutsü, customary institutions kumzüka ayutsü, meranga inyaktsü aser Naga nunger maitsü kumzüka ayutsü asoshi akangshitsü ayongzüker.

Pei puti otsü, sobaliba aser arok tejangraba nung shidak aliba nüburtem kodanga mesamatsü, ta ashi.

Naga nunger tashiji asen telungjem nung keta lir. Asenok kin aser region balala nungi süaka, puti otsü kasa aser asen totsüla-oboula nungeri inyaka yutsüba mapa tajung kumzüka ayutsü mapa kasa lir.

Iba Tulini benjong ajanga tangatetba tajung tali adokdaksütsü, kati ka dang temeim sayutsü, amalitep akatsü ajungmesoang aser yimjung, arok terenlok aser asen sobaliba wazüka ayuba nung len aniang ta moatsür.

Tulusang Tsüngremi kibong shia temoatsü, anema aliba, shisatsü aser telungjem moajangma, ta NSCN/GPRN sangdong ajangasa ashi.

Advisor K. Tokugha Sukhalu-i Committee senden ayonger

Dimapur, Chiteni/July 06 (TYO): Advisor aser Chairman, Committee on Urban Local Bodies & Nagaland Village Councils (Vis-a-vis The Nagaland Municipal Act, 2023 and The Nagaland Village and Tribal Council Act of 1978, as amended up to 2022), K.

Tokugha Sukhalu-i iba committee senden July 10, 2026 anüngdang 11:30 ako nungi tenzüka Assembly Secretariat, Kohima nung aliba C. Chongshen Committee Room nung ayongzükogo.

Iba senden nung Committee züngsem ajak arua adentsü paisa metetdaktsü.

DC Noklak-i Kingjung aser Wui yimtsüng semdang



Deputy Commissioner, Noklak, P. Mono Khiamniungan aser district ketdangsür temi Kingjung aser Wui yimtsüng semdangba mapang tangokba noksa ka yangi angur.

Dimapur, Chiteni/July 06 (TYO): Deputy Commissioner, Noklak, P. Mono Khiamniungan den district administration aser department balala nungi ketdangsür temi July 4, 2026 nü Kingjung aser Wui yimtsüngtem semdanga liasü.

Iba mapang DC-i yimdaklirtem dang sorkar indang scheme balala mapa kuma inyakba nung amaliteptsü ayongzük aser nüburtem terenlok asoshi telongjemji tongtipang lir ta ashi.

Pai Village Councils aser nüburtem dang Census ketdangsürtem den teka amteper Census 2027 mapa takok ngua inyakdaksütsü mepishia liasü.

DC P. Mono Khiamniungan-i kaketshirtem dang pei nüburtem ajungtsü aser terenlok atema shilem agütsü ajungshi aser bendanga agütsür shisaliok bushitsü ayongzüka liasü.

Wui yimtsüng nung chibo atepba yimya tanü tashi amshia aruba Mono-i tenüngsang agütsü aser maneni iba yimya mesamadaktsü wazüka ayutsü

ajungshia liasü.

SDO (Civil) Noklak, Vikhoto Richa-i Thonoknyu Aspirational Block indang lemsatep, kechiaser iba kübok Kingjung aser Wui yimtsüng ya aiter. Pai nüburtem dang sorkar indang scheme balala meshia agütsü ayongzüka liasü.

Sensaksemba mapang Wui yimdaklir temi timtem balala ajuruba lemsatep, talisa lenmang majungba, education sector nung tebilemstü akaba aser tanga terenlok maparen indang tuteta ashi aser administration dang yaritsü mepishia liasü.

Iba sentong nung shilem ka ama Social Welfare Department kübok District Hub for Empowerment of Women (DHEW), Sakhi One Stop Centre, aser District Child Protection Unit (DCPU) ajanga awareness sessions agia liasü.

Kasa mapang Medical Department-i medical camp ka ayongzüka yimdaklir temang repranga teyari agüja liasü.

Maneni Aadhaar enrolment camp aser SBI account tasen lapoktsüba mapa tema inyak.



July 06, 2026 nü Ato kilonser Narendra Modi Jakarta tonga aoba mapang Indonesia Tir, Prabowo Subianto-i pa agizükba sülen tangokba noksa nung angur.

India nunger nisung 9 shia nungi ka dakbo cancer putettsüsa lir

New Delhi, Chiteni/July 06 (Agencies): 2024 küm kija nung India nung nisung lakh 15.33 dak cancer tashidak puteta liasü aser India nunger nisung 9 shia nungi ka dakbosa akumli mapang nung cancer tashidak putettsüsa lir, ta osang ka ajanga metetdaksü.

Iba dak sendakba nung Rajya Sabha committee kati nüburtem aser mongintem dang jenjang dalang agi cancer screening asütsü, putettsü aser treatment agütsütsü atema tebilemba onüktem lemsatepang, ta metetdaksü.

Kanga menor ang cancer tashidak putetba aser cancer tashidak atema treatment agiba nung sen aika adokba tebilemtsü onüktem panel-i asadangogo.

Department dak sendakba Parliamentary Standing Committee on Health & Family Welfare-i cancer dak sendakba tebilemtsü onük balala asadangba sülen healthcare tsütsü mongintem, research agirtem, shirangertem, industry nung züngsemtem aser nüburtem dang tebilemba onüktem lemsatepang, ta mepishia metetdaksü.

Cancer tashidak tendangba, putetba aser treatment agütsüba technology tsütsü terenlok kanga lir, ajisüaka jenjang kanga asakba agi shirangertem aikati treatment magiteter. Iba dak sendakba tebilemtsü onüktemji Samajwadi Party MP, Prof Ram Gopal Yadav-i aniba Parliamentary Committee-i jungjunga asadangogo.

Rajya Sabha MP aser Parliamentary Standing Committee on Health & Family Welfare nung züngsem, Ajeet Madhavrao Gopchade-i, "India nung cancer anepaluba infrastructure tsütsü kanga terenlok lir. Ajisüaka shirangertem atema tekeraba nung jenjang dalang agi screening agiteta treatment agitsü ya tebilemtsü tuluka lir. Tekeraba nung iba tashidak puteta jenjang dalang agi cancer treatment agitettsü atema committee-i tebilemba onüktem lemsatepang ta mepishir," ta metetdaksü.

Sir Ganga Ram Hospital nung department of surgical oncology nung tongti aser chairman, Prof Chintamani-i,

"India nung nisung aikati cancer tashidak aser screening agiba indang junga mangatetba kuli ajanga stages III aser stage IV nung ang cancer tashidak puteter. Kanga menor ang cancer tashidak putetba agi nisung aika cancer tashidak agi asür. Iba tashidak agi shirangertem taneptsü angutsü atema nüburtem nem iba tashidak indang junga angatetdaksütsüla, screening agitsüla aser tashidak tulu makümdang treatment agitsüla," ta metetdaksü.

Parliamentary committee nung züngsem Dr. Mahesh Sharma-i, "Cancer treatment jenjang tasak asüba ya tongti tebilemtsüka lir aser shirangertem aikati treatment atema sen magütsüteter. Committee-i Parliament nung tebilemba mebenokdang tamasa iba tebilemtsü dak sendakba nung tebilemba onüktem bendener," ta metetdaksü.

Item tebilemtsü dak sendakba nung tebilemba onüktem lemsateptsü atema Parliamentary committee-i stakeholders nem anogo 15 agütsüogo.

July 30 nü by election agitsü aser August 3 nü vote azüngtsü: ECI

New Delhi, July 06 (Agencies): Hombarnü Election Commission of India (ECI)-i Bihar, Madhya Pradesh aser Gujarat state tem nung assembly menden asem atema by election agitsü atema sangdong ka agütsüogo.

Election Commission-i, by-elections ji July 30 nü agitsü aser August 3 nü vote zünga osang sangdongtsü, ta metetdaksü.

July 13 tashi nomination file asütsü akok, July 14 nü nomination papers reprangshitsü aser nominations

agentsü atema July 16 tashi mapang agütsütsü.

EC-isa, polling station ajak nung Electronic Voting Machines (EVMs) aser Voter Verifiable Paper Audit Trail (VVPAT) units amshitsü, ta metetdaksü.

Voters maitsü jangjatsü atema tongti document ji Electoral Photo Identity Card (EPIC) asütsü, iba denji külemi voting atema Aadhaar, passports, driving licence, PAN card, MGNREGA job card aser sorkari agütsüba identity

documents ajak agizüksü, ta EC-isa metetdaksü.

Tang nungi tenzüka assembly constituency asem kübok aliba district ajak nung Model Code of Conduct (MCC) benoker, ta parnoki metetdaksü.

Commission-isa candidate tem dang parnok anema ozüng alema inyakba ken o kar danga benoka lira election nüboyimba mapang nung osangkakettem aser television nung asembenbosa metetdakjang, ta tuyuogo.

OJALA ASER OTSÜLA MENUNGRA BILEMTETER

25th Death Anniversary



Late Supongmongla

Na mali onok mulungjang nung teti menungraseta nü sarasadem bilemteter. Onoki na teti akhümtsüba bilemtettsü.

- Temeim Chimur, Anük-apang & Semchirtem.

Ram temple Trust-i Champat Rai melen General Secretary tasen shim

Lucknow, July 06 (Agencies): Uttar Pradesh kübok Ayodhya nung Ram tekülem ki tenla aika auyaba ken o dak sendakba nung Hombarnü Shri Ram Janmabhoomi Teerth Kshetra Trust senden ka menogo, aser iba senden nungji parnoki Trust general secretary, Champat Rai-i menden nungi sodi meshiba shidi agütsüba agizükogo.

Trust-isa, general secretary tasenbaji Bajrang Bagra asütsü, ta metetdaksü.

Hombar nikongdang 3:15 ako meta Shri Ram Janmabhoomi Teerth Kshetra Trust senden tenzüka liasü aser 6:00 ako nung ang tembang. Iba senden nungji Trust chairman Nriya Gopal Das densema Permanent züngsem parnok 9 nungi parnok 7 aden. Senden nungji Rai aser Mishra nabo maliasü.

Ram tekülem ki tenla auyaba dak sendakba bushisüngdangtsü atema Uttar Pradesh state sorkari Special Investigating Team (SIT) tenteta liasü; SIT-i bushisüngdangba mezüngbuba shilem report agütsüba sülen Champat Rai aser Trust züngsem, Anil Mishra nati Trust nungi anenba shidi agüja liasü.

SIT-i agütsüba report nungji, Ram tekülem kidang CCTV cameras aika inoka lir, ajisüaka tenla azüngtsü atema lemozüksüba staff temi senotsüji

koma auyaar metetdakja lir. SIT-isa, Ram tekülem ki tenla sen crore 7 nungi crore 7.5 shi samaogo, ta metetdaksü.

Iba ken o dak sendakba nung police-i nisung 8 puogo aser parnok rongnung Champat Rai'er driver Ram Shankar Yadav (Tinnu Yadav)-a densema lir.

Hombarnü Samajwadi Party Tir aser taoba mapang Uttar Pradesh chief minister inyaksang, Akhilesh Yadav-i, "Asenok tamangba yimsü aser asen tamang den asayar. Kechi atalokerar ajaki meteta dang lir, ajisüaka parnoki ola madoker. Gol ana aketba sorkari (UP aser Centre) amalitepa meinyaker; ajisüaka parnok tsüngda mangatettep lir," ta metetdaksü.

Paisa, sorkar tashi nung alirtem rongsen agi tenük pokdaksüogo, aser sorkartem tsüngda tashi atema rarateper, ta metetdaksü.

Ano külen Congress-ia Supreme Court dang iba ken o ya agizüksüla aser bangdak lenirtem anema inyaksüla, ta metetdaksü.

Congress-isa, senotsü auyabaji senotsü dak sendakba ochimashi ka dang masü, saka iba tekülem ki atema tenla agütsür India nunger ajak tamang ashioksüba lir, ta metetdaksü. Aam Aadmi Party-ia, iba ya temaba jenjang nungi asalentong yanglur inyakba lir, ta aitsü.

Amit Garg NCRB Director shim; Alok Mittal BPR&D tongti shim

New Delhi, July 06 (Agencies): Hombarnü IPS officer Amit Garg National Crime Record Bureau (NCRB) nung Director shim aser IPS officer, Alok Kumar Mittal Bureau of Police Research & Development nung Director General shimogo.

Garg ya 1993-batch Indian Police Service (IPS) officer lir aser tang Hyderabad nung aliba Sardar Vallabhbhai Patel National Police Academy (SVPNPA) nung Director teinyakdak.

Appointments Committee of the Cabinet-i National Crime

Record Bureau (NCRB) nung Garg Director shimogo aser pa sangküm October 31 nü iba menden nungi anisüngzüksü.

Appointments Committee of the Cabinet-isa Mittal Bureau of Police Research and Development (BPR&D) nung Director General shimogo aser pa 2029 küm June 30 nü iba menden nungi anisüngzüksü.

Uttar Pradesh nungi 1994 batch IPS Officer, Sujeet Pandey SVPNPA nung Director shimogo aser pa 2028 küm July 31 nü iba menden nungi anisüngzüksü.



July 06, 2026 nü Shimla nung tzünglu kanga aruba sülen süngdong ka laoba ajanga gari kar raksaja aliba noksa nung angur.



TIR YIMYIM YIMOBILEM (EDITRIAL)

DIMAPUR TUESDAY, JULY (CHITENI) 07, 2026

Shitakba nübo nüngdaker

Tang ya linük nung kilen shia kibong tia aser nütsüng sükdangba mapang lir, anungji asenok ajaki asen kinunger, asen yimer aser asen kin nübo aika sayunüba mapang lir. Ibayongji, talisa, town nung alirtem rongnung nisung aikati pei tsürabur yimtak pei tenüng züludaktsütsü atema ki asür. Ano, yimtsüng kar nungbo yimteni pei yimer bendanglen prokshia alirtem ajak pei yimtak tenüng züluktsü asoshi özüng amai agütsür. Iba jagi Nagaland nung, talisa, Naga nung kin ajak meyoktepa alidak Kohima aser Dimapur town nung metetmeteta nütsüng ajemtsü. Aji oda, tesüiba mapang Kohima town nung nütsüng sükdang dang nütsüng ajak agi lakh ka ser meyirijang roker pezü shi liasü, saka tang Kohima town nung kilen sükdanga aodang nütsüng züngdangtetba agi nisung meyirijang tir trok dang lir. Tetezüji, Kohima nung alir nütsüng tesadang kabo Kohima town nung alir ama masü saka pei tsürabur yimtak alir amai züludaktsüogo ta jangjar. Iba jagi Kohima town kanga akoksatsü, kechiyong Kohima town nung nütsüngbo lakh ana jungnua lir saka nisung meyirijang tir atemaji dang India government-i terenlok sentongtem yanglutsü aser senotsüa lemkütsütsü. Iba jagi jashir, Kohima Municipal Council office nungi Kohima town nung kiyong aser mepu shia dangi nütsüng yongsük sükdangbaji jungjunga khen reprangshir Kohima town nung alir tashibo Kohima town nung pei tenüng züludaktsütsüla ta metetdakja lir. Atangji, aji shitak kechiyong Kohima nung alirtemji Kohima tenüng nung aruba light aser tzü agir aser Kohima tenüng nung yokba sen agi yangluba lenmang nung jajar. Iba amaji Kohima tenüng nung aruba tajangzük aser temoatsü ajak agia Kohima nung alir, ajisüaka Kohima nung item tajangzük aser temoatsütemji agia alir nisungtem kwiar ta metetnua ki aser nütsüng sükdangyonga arudangbo, Kohima nung malir ama akümtsübaji shitak masü. Ibaji Kohima ashioktsür asütsü. Kasaji, Dimapur aser tanga town nung mataloktsü merangtsüla. Asenok Aotsür Aortem balaka alima ajaki meteta Mokokchung nung ato ta lumia Tsüngrem tsüngdang taidok meshia sarasadema monger, ano tang kilen aser nütsüng yongsük sükdang tenzük nung, asenok sarasademer Amen sü-mesü ka aibelentsübaji koda ? Tsüngrem tsüngdang ibaji asenok asoshi tarendaktsü aser tetsübuttsü mapa ka asütsü. Joko, Tsüngremi asenok nem Chungliyimti toktsür alima tasen bushia aoba anogo nungi tenzüker tanü tashi nung alima tesem balala nung alinük tuluka moaja lir aser asenok kong lidir, aji asen Ao lima, kechiyong asenok yangji alir. Ajisüaka, asenoki Mokokchung dang asen lima amai bilema idakji dang talia alitsüla aser tenünga alitsüla ta renloka moudaktsüi kangshira, asenok rajang akümer asütsü aser asenok ajak tesem tilaka nung alir asünungji putepa melitetsü. Ibaji angateta, asenoka tangar jilu ajizüka akok tashi pei tsüraburtemi mesemteta yutsüba tesem nungjisa melii alima tasen tasen bushia oa mesemteter pei lima küma alitsüla. Atangji, Dimapur nungbo iba amaji tesemji aika lir. Item rongnung Indisen, Aoyimsen, Aoyimkü, Aoyimti, Aoyim aser Tiryim ama Aor yimtsüng aika kümteta lir. Itemji Mokokchung nungi ano Ao lima tuluba küma renlokaktsürtem asütsü. Ano, itemji dang masü saka Dimapur aser Chümoukedima district nunga kiyong aser mepu teimbaka Aor mepu aser kiyong amai dang kümteta lir. Atangji, item ajakji asen lima, anungji yangji alirtem kilen aser tenüngji yangji alitsüla. Tang kilen aser nütsüng sükdangba sülen ya ano mejamejaa nütsüng sükdangba sentong tenzüksü aser iba sülen election mapang atongtsü anasa ano voter-tem tenüng reprangshia zülukshiba sentong ka alitsü. Ashiko, ano asenoki idangjisa nütsünga aser voter-tema teimba sünütsü. Aji nisunger yimya, anungji ajibo Tsüngremia maitsütsü südi. Ajisüaka, asenoki tiyazü agi kilena aser nütsünga tiyazü agi aika kümdaktsütsü merangra ajiang Tsüngremi aitsütsü. Atangji, tiyazü agi kilen aika sayuba aser tiyazü agi nütsüng sayubaji pongmang nung aon tajung den chiyonger amai dang lir, aji agi asangsang nungbo asenok ashioktsütsü. Aji oda, asenoki asen yimer aser asen kin nütsüng aika sünüra Tsüngrem dang onok nü nübortem nütsüng zündakjang ta ochi mulung agi sarasademtsüla, kechiyong shitakba tagitsüba nütsüngbo Tsüngremi dang agütsütsü. Idangji asenoki Mokokchung town nung lumia sarasadembato bilemtetsü aser Tsüngrem tenüng asangtsü.

OLEMSABANG

Tzülu nung aih madokdaktsütsü atema inyakba yimya

Courtesy: Fostering Climate Resilient Upland Farming Systems (FOCUS), Nagaland.

(Yashi adok nungi...)

Tillage: Tillage ajanga aih mekotettsü aliba temai adoka sayur/ajitetdaktsür aser anü tatsük ajanga ibaji kongdaktsür/südaktsür. Anü nungi aluba tatsük ajanga ali telung nung aliba aih tedong (rhizomes), aih indang shi (tuber), tera aser aih tedong nungi adokba tera tepseter. Aih tamajung/tara (Notorious weeds) pangtongyi (Cyprus rotundu) aser tera nungi adokba aihtem (perennialweeds) koba parnok tejang ali telung nung yia alir itemji ali aroka bitetba ajanga indokteter **Ali temo inokba:** Chiyungtsü tamajungtem, an metsüdak nungi aluba an scü, aih shisa aoba, tu shisaba amala, alu merükba mapang koba alu nungi bendener, itemji ali temo ama tsünusempongtsü kar nung amshir, item tsünusembongtsütemji, haldi/wakong, mersü, süngmok, alo. Iba ya aih memeyidaktsütsü atema alemli nungi amshia aruba yimya ka lir. Tanü asüngbo aih memeyidaktsütsü atemaji plastic 1000-gauge teka temelem agi aliji meyibanga ayuba ajanga aih memeyiteter aser iba inyakyim ajanga aih meyiba nungi kanga junga nokdangteter aser iba ajanga ali tayi kümdaktsür.

AI MEMEYIDAKTSÜTSÜ ATEMA NISUNGI INYAKBA

TEKA AGI ATSÜBA: Aihji teben mapongdang aser tejang matangdang atsütokba ajanga aih aika meyiba nungi kümzüker aser ali nung aih tejang meproksir.

Teka agi abiba: Oset/hadir tilatem piljar (khurpi), kodarang (kasolla), mertsüng (spade), wheel-hoe, amala. Itemji amshia tsünusempongtsü alu nung ai bitoker. Teka agi aih bitokba mapa ya tsünusembongtsü azüng shia inyaker.

Mi agi meroktokba aser tzü tatsük agi aletba: Süngjang lu aser tsünusembongtsü yoka aliba alu nung aliba aih ya tzü tatsük agi aletba mesüra mi agi arongba ajanga jungjunga samadaktsür. Iba mapa inyakba yimya ya mopung aonba mapang aruba/agizükba tsünusembongtsü lu nung kanga tajung.

Aih pitokba/leptokba: Iba inyakyim ya aih aika adoka alidang tesem nung inyaktsü atema kanga tajung lir. Iba yagi aih aika meyia alidak alu, ground, lenmang anasa, süngjang lu aser tsünütsü ano metsünü-i aliba alu tem merükdaktsür. Iba inyakyim ajanga aih memeyidaktsüba kisüng dang masü saka iba ajanga ali nung ali temo talila bendenloka ali tashi idaktsür.

AI TAKÜM ALIBA SHIRURUTEMI ACHIBA

Taküm aliba shiruru kar itemji, shiruru tila (insects), tanga shirurutem, tashitak adoktaktsüba mesentem aser tanga süngdongtem den toktepa ainba süngdong (competitive plants) ajanga aih aika meyiba nungi kümzüker.

Aih mozü: Iba ya aih südaktsütsü atema amshir, ibai tzü den meyokteber agir. Aih südaktsütsü mozü ka koba aih nung kaloktsür.

ALU NUNG AIH ADOKBA NUNGI KÜMZÜKTSÜ ATEMA ALEMLI NUNGI AMSHIA INYAKA ARUBA YIMYA

Nagaland nung Kohima district kübok tenem nung aluyimertemi aih tamajung koba agi nisung aser alu nung timtem agütsür, item aih aika adoka aliba tesem nung alishi tsünür, alishi kara ainba ajanga tesem ajakji amokbanga aküm agütsür. Küm anabuba nungibo aihji sama-a akümtsü aser iba den külemi tsünütsü meyia aliba nungi tajangzük angur.

Nagaland nung Mokokchung district kübok aluyimertemi, tekong lu nung tu tulu aliba ai südaktsütsü atema metsü (common salt) amshir. Ajida süaka iba yimya ya amshiba ajanga ali temo, ali tajitsü, ali yimyatem nungji kecha timtem adoker madoker junga shisadangtsüla.

Tekong lu nung ai samadaktsütsü atema alu chir arunger, iba alu ayimba yimya ya north eastern state aika nung alemli nungi inyaka aruba mapa ka lir.

Tokong lu ayimba tesem aih nungi kümzüksü atema Jenjangmenjang (Sesamum) nunger dena tsünür.

Teti bulua meyoktepa yokba tsünusembongtsü nung azü (Perilla) teti tsünür. Iba ajanga aih aika toktepa meyiba nungi nokdanger. Tokong lu nung azü tejbtem jagi alu kongdaktsür.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Venezuela nung Khristan field hospital ka nung nisung aika yaridar



Khristan melungtet telok Samaritan's Purse-i Venezuela nung field hospital ka amenoka aliba noksa nung angur.

July 06, 2026: Tawa Venezuela nung menoknok lendong tulu atalokba sülen Khristan melungtet telok Samaritan's Purse-i Venezuela nung field hospital ka amenokba sülen tang tashi nung yirua alir nisung 300 dak tali yariogo.

Taoba ita Venezuela kübok La Guaira region nung menoknok lendong tulu nung nisung 3,000 jungnüa asü aser nisung 16,000 dak tali yiruogo.

La Guaira nung Field hospital director, Peter Holz-i, tang tashi tensa mesüngjemer aser nisung meyrjang aika tesem balala nung prokshia lir, ta metetdaksü.

Holz-i, "Kiojen aika chirepa lir. Onok menoknok anakba

tongti tesem anasa lir. Onok iba tesem tonga aruba mapang nunga tensa mejungi liasü. Nisung aika moapu nung ang mejanger aser parnok ki liaka kidangi meyipa aotsü tsübur," ta metetdaksü.

"Anogo ana tejaklen onoki emergency field hospital amenokba sülen tang tashi nung onoki nisung 300 dak tema yariogo. Onok kanga mazüngi lir. Onoki surgery 10 bo agiogo aser ano aika agitsü," ta paisa metetdaksü.

Samaritan's Purse-i amenokba field hospital nungji operating theatres, intensive care units, pharmacy ka aser laboratory ka densema lir.

Alima tesem ajaklen K h r i s t a n t e m i

sarasademtsütsüla, ta shia Holz-i, "Yisu Khrista memetetertem-a onok indang field hospital-i arutsü atema onoki sarasademer, kechiyong onoki parnok dang temeim balaka (Khrista temeim) sayuner," ta ashi.

"Ozü staff tem atema sarasademjang. Iba maongka anguba ajanga parnoki yangi aliba nisungtem den sendakteptsü aser parnok den Yisu osang lemsateptsü atema onoki sarasademer," ta paisa metetdaksü.

Tang tashi nung field hospital nungji Samaritan's Purse indang international staff 40 lir aser ano nüngdak apir team aika yoktsü tebilemba lir.

Nigeria nung tesüiba küm 6 tsüngda Khristan 28,500 tepsetogo

July 06, 2026: Nigeria nung Khristan meyrjang aika taküm samadar, aser parnok teimbaka Fulani kiralongrartem ket nung asür, ta report tasen ka ajanga metetdaksü.

Observatory for Religious Freedom in Africa (ORFA)-i sangdongba report nungji 2019 küm October ita nungi tenzüka 2025 küm September ita tashi nung Nigeria nung Khristantem tepsetba aser puer aoba osang tejangja metetdakja lir.

Nigeria nung 2019 küm October ita nungi 2025 küm September ita tashi nung Khristan 28,551 tepsetogo, aser kasa mapang nungji Muslim nunger 13,224 tepset.

Khristantem aika tepsetba state tem nung Muslim nungertem tepsetba den medemdangra Khristantem tepsetbaji 4.4 ben agi teimba lir.

Khristantem tepsetba shilem 75 shibo aluyimer Khristantem amakdang tepsetba lir.

ORFA-i ashiba agi, 2019 küm October ita nungi 2025 küm September ita tashi nung telok balalai nisung 34,773 puer ao. Nisung puer aobaji shilem

43 bo Fulani kiralongrar teloktemi lir aser shilem 49 puer aobaji mejangjaba kiralongrar teloktemi lir.

Telok balalai pua ayuba mapang nung Khristantem aser Muslim nunger naji khenyongi balala züngshir. Khristantem chioktsü atema sen teimba meshir, aser Khristantem teimba tepseter.

Item teloki apuba tetsürtembo kangshia Islam yimsü dangi meyipdaksür, tashiyim amshia raksatsür aser kangshia kibong kümdaksür. Iba report renemba mapang nung Nigerian partners aser Armed Conflict Location & Event Data (ACLED) project-ia yaritepa liasü.

2019 küm nungi 2025 küm tsüngda Nigeria nung nisung 79,323 tepsetogo aser ibaji anogo shia nisung 36 tepsetba den kasa lir.

Civilian tepsetba shilem 44 bo Fulani kiralongrar teloktemi lir, mejangjaba kiralongrar teloktemi shilem 32 tepset, Boko Haram teloki shilem 8 tepset, Islamic State West Africa Province (ISWAP)-i shilem pezü tepset aser shilem

12 bo telok balala tsüngda raradang tepsetba lir, ta kasa report ajanga metetdaksü.

ORFA senior research analyst, Frans Vierhout-i, "Nigeria nung nisung teimba tepsetbaji Fulani kiralongrartemi lir. Nigeria nung kiralongrar network tuluba dang akümer, ajisüaka alimai ibaji tang tashi memeteter," ta metetdaksü.

Talisa 2000s mapang nungi tenzüka Nigeria kübok Middle Belt nung anogo shia amai Fulani teloki Khristantem tepseter.

North tsütsülen aliba state aika nung Sharia ozüng benokogo aser Islamic tangatetbatem kanga bulua akümba ajanga prangpong amer telok aika pokteter, ta report nung shia lir.

Kasa report ajanga Nigeria nung yimsü temeden atema alima linüktemi inyaktsü, ozüng alema inyakba nokdangtsü atema Nigeria nung ketdangsertem rongshitsü, Centre aser state sorkartem tsüngda amalitepa inyaktsü aser takoksa angurtem nem teyari agütsütsü benok.

ANOGO ABEN TSÜNGREM DEN

Melangzüba Tasüngdangba T.Ken 77:7-10

Langzütsüba dang nungi asüngdangtsüba temelaba. Item tekongtem nung tasü mait nisung kati tasüngdangbatem asüngdangba angur. "Kibubai teti asoshi ni sentokdi ma? Pa taochi teti asoshi oadokogo ma? Pai nangzükbaka joko amajok asü? Pai ain adoka pai taochi shibangogo ma?" (t.7-9). Aser tatem nung yamai ashi, "Ya ni tashi maitba; saka tematiba teka tajichilen aliba mapang ni bilemtet" (t.10).

Kodang asenok timtem ajanga odir asenoki yimya agi tasüngdangbatem asüngdangba. Dawid sarasadem, "Kü Tsüngrem, kü Tsüngrem, kechiba nai ni sentoker?" (T.Ken 22:1). Yisua kangki nungi iba o jembi (Matt. 27:46). Kodang asenoki timtem ajanga odir, asenoki Tsüngremi yaritsü aser kümzüksü imlar. Aser kodang kümzüksü atar asenoki maremzüker. Iba mapang nung tasüngdangba asüngdangba.

Tsüngrem dang ochi shia ashitsü tsübua teli. Pa dang ne tebilembatem shiang. Pai na anemsü mesüi ochi shia lidaktsüner. Saka ya bilemtetang: Khristan ama, asenoki rasaa ashiba nung masü; tenangzükbatem nung asenok alir. Tatishitsü agi, Tsüngremi iba tasüngdangba langzütsü tenzüka. Kibubai teti asoshi sentoktsü asü? Masü. Pai ojang aochitsü asü? Atangji, Pai maongka sayutsü Pa taochi teti asoshi oatoker asü? Masü. Tsüngremi item tasüngdangbatem ajak langzüra balaka asütsü asü? Ne mulung tera süneptsü akok, saka tiajibo memelenshir. Tamang ajanga liang, tanguba agi masü. Kibuba tenangzükbatem nung amangang. Pai memelenshitsü.

Tsüngremi ne timtem nung tetibo ratetta mashitsü, saka Pai pa o tenangzükbatem agütsür. Na teimla makai tasü mait akümdang, sarasadem nung ne tasüngdangbatem Pa dangi bener arung, Pa o tenangzükbatem nung temulung leman. Tsüngremi ne nüngdaktem metet aser itemji agütsütsü.

Uganda nung sayutsüngir ka dak azük

July 06, 2026: Uganda nung amshiba ashishia parnok sayutsüngir ka aser pa tsüngda mangatettep adok. kinüngtsü nati evangelistic Iba sülen Muslim outreach sentong ka nung nungertem jagi hadir kar shilem agiba sülen tena amshia David Musobya anenzükba kidangi meyipa tekolak yirutsü, ta pa aoba mapang nung Muslim kinüngtsü, Elizabeth Nakato-i nungertemi azük.

Arrshi küm 37, David "Muslim nungertem jagi pa Musobya aser pa kinüngtsü na dak ajemshi aser maneni pa Mayuge, Mayuge District-i oa dak azük. Kü kinüngbu tetsüng aonung tekülem sentong ka tabelen aser teka tajichilen nung shilem agi, iba sülen sükdang," ta Nakato-i ashi. moapu nung sayutsüngiba "Parnokisa küna ket nung sentong ka nung shilem agia aliba Laishiba shisatsü aser pa liasü, ta osang ka ajanga süchia mao tashi pa dak azük. metetdaksü. Parnoki kü dakbo teka

Sentong tembangba sülen mesangshi," ta lai ashi. David aser pa kinüngtsü na Tesülen truck ka aruba aonung 7:00 ako meta Ikulwe mapang nung ang Muslim Centre nung tena anenzükba nungertemji jena ao. Truck kidangi meyipa aoba mapang nung alirtem jagi Musobya nung Muslim nunger 9 aru aser gari nungji anioker Mayuge nung aliba hospital kati anir ao. nüngdak iba tesem yagi aru? Arogo nung pastor, Joseph ta asüngdanga liasü. Omala-i, Musobya treatment

Muslim nungertem jagisa tembanga hospital nungi tenati Yisu Khrista indang shilangba sülen parnoki police sayutsüngiba aser tekülem nem ken o agütsütsü, ta sentong nung Kangki ka metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Yira

(n) temang tulu aküm (become fat, gain weight)

* Temang yiraa mekümdaktsütsü merangtsüla.

Yira

(n) yi jemnüa aitba, yi majem melitetba (alcoholism)

* Yi ajemba agi yira aittsüsa kümerbo yi toktsütsü tasak .

OLONG PAITEP # 7558

1		2			3		4		5
				6		7			
8									
						9			
			10						
11									12
					13		14		
15									
16							17		

TIPIEN

1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7557 TELANGZÜBA**TIPIEN :**

1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

1. Temesen, 2. Raksa, 3. Aon,
4. Aso, 6. Nile, 9. Alizüing,
10. Omen, 11. Lemta, 13. Ola,
14. Kin.

NAI-A YA METETTER**FIFA World Cup 2026 nung goal teimtiba agüja alirtem:**

- Kylian Mbappe (France) - 7 goals, 2 assists
 Lionel Messi (Argentina) - 7 goals, 0 assists
 Erling Haaland (Norway) - 7 goals, 0 assists
 Harry Kane (England) - 6 goals, 1 assist
 Ousmane Dembele (France) - 4 goals, 2 assists
 Mikel Oyarzabal (Spain) - 4 goals, 1 assist

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Conrad Sangma-i Amit Shah den FCRA tebilemstsütem lemsatep**Shillong, July 6, 2026**

(Agencies): Meghalaya Chief Minister Conrad K. Sangma-i Deobarnü New Delhi nung Union Minister Amit Shah den ajurutepe Foreign Contribution (Regulation) Act (FCRA) nung onük kar atema tebilemstsü lemsatepogo.

Chief Minister Conrad den Meghalaya nungi arogo aser lokti lennirtem dena liasü.

Parnoki Home Minister Shah dang Foreign Contribution (Regulation) Act (FCRA) nung onük kar atema tebilemstsü lemsatep.

Iba ozüing nung temelenshi kar asütsü aliba ajanga Meghalaya nung religious, educational, charitable aser social welfare institutions

inyaksangshi nung kongshitsü ta parnoki ashi.

Item rejutemi schools, colleges, hospitals aser community service programmes maparen inyaker aser talisa iba mapa ya yimtsüngtem aser meta talang pilar alidak inyaker ta Meghalaya nungi teshimtet teloki ashi.

"Item rejutem ajanga Meghalaya nung social aser educational life nung tongti shilem agir anungji FCRA dak sendakba nung Meghalaya nung ajuruba khuretem angateta inyaksü mepishir" ta CM Conrad-i Amit Shah ayongzük.

Paisa Centre sorkar dang public service atema

inyaksangshiba chichiba rejutem dak mekongshitsü mepishi.

Iba teshimtet telok nung Presbyterian Church of India (PCI), North East India Christian Council (NEICC), Catholic Church (Archdiocese of Shillong) aser Garo Baptist Convention nungi lennirtem dena liasü.

Parnok rongnung Rev. H. L. Myrsing, Moderator, PCI; Rev. S. C. Diengngan, Chairman, FCRA Sub-Committee, PCI; Rev. Dr. Meyu Changkiri, General Secretary, NEICC; Fr. Teiboklang Kharbani, Administrator, Archdiocese of Shillong; aser Durasal R. Marak, Youth Director, Garo Baptist Convention nunger densema liasü.

Assam nung Rs 8 crore jenjang Yaba süngjang apu**Guwahati, July 6, 2026**

(Agencies): Cachar aser Hailakandi nungi Assam Police district units den Assam Rifles külemita aodang Rs 8 crore alang Yaba tablets 80,000 puogo aser iba dak sendakba nung Deobarnü metetdaksüogo.

nisung ana pua lir.

"Iba mapa atema Cachar Police, Hailakandi Police aser Assam Rifles nem tenüingsang agütsür" ta Chief Minister Himanta Biswa Sarma-i Deobarnü metetdaksüogo.

Assam state sorkari anti-drug campaign akangakanga inyaker aser tang apuba ajanga ozüing amertemi state nung narcotics trafficking azüoktsü meranga inyakba kuli agütsür ta Chief Minister Sarma-isa ashi.

**GOVERNMENT OF NAGALAND
 DIRECTORATE OF TECHNICAL EDUCATION
 NAGALAND: KOHIMA**

NO. DTE/ ESTT-2/02/2025-26/**Dt. Kohima, the 6th July, 2026.****NOTIFICATION**

This is to inform the CUET-UG 2026 applied candidates, intending to avail Nagaland State Reserved Seats for undergoing Medical Allied and Agri Allied Degree courses during the academic session 2026-2027, that the Merit list based on CUET-UG 2026 marks (Annx - A) and rejected list (Annx - B) has been uploaded in the Department website: -<https://dte.nagaland.gov.in> and also on the Notice Board of the Directorate of Technical Education, Nagaland, Kohima. The candidates are therefore informed to thoroughly cross-check their details as furnished such as; Name of the Candidate, Fathers Name, DOB, CUET marks, Scheduled Tribe and Backward Tribe.

In case of any discrepancies detected, the candidates are informed to provide the correct details to the office of the undersigned on or before 9th July, 2026 during Office hours. Thereafter no correction or changes in any manner shall be entertained.

(Er. VIPULHOU LHOUNGU)
 Director.

Sri Lanka tepuokdak rongrong adok; nisung 19 asü aser 72 yiru



Colombo, Chiteni/July 06 (Agencies): Sri Lanka nung aliba Negombo Prison telung nung azüdokshi nungi asür nisung 19 jungogo aser 72 yiru, ta ketdangsür temi Hombarnü ashi aser parnoki iba tesem jungunga azüoktsü maneni meranger.

Deobarnü tepuokdak telung nung tsükchir telok balala tsüngta mangatettep adoka azüdokshi ya atalok aser tepuokdak alir kari tepuokdak prangbong yua aliba tesem

nungi prangbong agizük ta ashir. Hombarnü tepuokdak prangbong yua aliba nisung kari agizüktetba sülen tensa tamajungba akum.

Negombo Hospital Director Pushpa Gamlath-i ashiba agi, yirur alirtem rongnung mezüng rongrong tenzükdang yiruba aser iba sülen azüdokshi mapang yirubatem lir.

Yirur alir aika temang anepaluba mapang lira ser ketdangsür temi iba tatalokba asadangba mapang lir.

Tepuokdak telung nung temesepba mozü shibelenba telok ka aser iba mapa anemer telok ka tsüngta mangatettep adoka iba azüdokshi lendong ya atalok ta tang tashinung bushiteta lir.

Tensa tamajungba akumba sülen Sri Lanka ketdangsür temi tensa azüoktsü atema Police Special Task Force (STF) den riot control units tem yoka liasü.

Tensa tamajungba mekumdaktsütsü asoshi tang rongdak mera agiba nung shilem ka ama tepuokdak alir nisung asem Pallansena Prison Camp-i yokogo.

Commissioner General of Prisons totuyuba nung special investigation team ka tentetogo, ta Prisons Department Media Spokesman AC Gajanayake-i ashi. Police-ia bushisüngdang ka tenzükogo ta ashir.

Kasa mapang Justice Minister Harshana Nanayakkara-ia iba tatalokba osang tejangja meshir aser magisterial inquiry ka tenzükogo.

China-i Pacific tzüyim nung missile ka tendang

Beijing, Chiteni/July 6 (Agencies): China-i Hombarnü Pacific tzüyim nung nuclear-powered submarine ka nungi missile ka tendangogo. Missile tendangba ya Japan, Australia aser New Zealand nungner ajaki ashishiogo.

People's Liberation Army Navy indang nuclear submarine kati dummy warhead ka bener missile ka Pacific kübok international tzüyim nung 12:01 p.m. (0401 GMT) nung tendangogo, ta official Xinhua news agency-i metetdaksü.

Missile ya tzüyim nung khaloktsünüba tesem nung tzükogo, ta kasa sangdong ajanga metetdaksü, saka iba dak alaka osang tejangja magütsü. Xinhua-i ashiba agi, iba ya China indang annual military training nung shilem ka lir aser linük mesüra target kar anema inyakba masü.

Australia Foreign Minister Penny Wong-i ashiba agi, iba missile tendangtsü aliba indang China-i Australia sorkar nem osang agütsüogo, saka iba missile tendangba ajanga parnok meketa aliba tesem mesüngjemteti kümdaktsür.

Australia aser Fiji nati Hombarnü defence dak sendakba nung tongtibang tenangzüktepba ka yangluba sülen ghonda ishika dang lir iba missile tendangogo. Linük ana yagi tsükchirtemi parnok amakba mapang kati ka yariteptsü nangzüktepa liasü.

Beijing aser US aser Australia nati aniba anüolen aliba linüktem Fiji atema mapang talangka toktepa aruogo, aser China-i South Pacific nung rongsenketzüng aser security dak sendakba

nung parnok inyakyim atsülangshitsü merangdar.

New Zealand nung amendaker aliba ship tracking firm Starboard Maritime Intelligence nung ken o asadanger Mark Douglas-i ashiba agi, iba missile tendangtsü atema mapang talangka nungi sentong yanglur liasü aser Australia o Fiji na Ocean of Peace Alliance sign asüba mapang shitak nung missile tendangtsüba osang agütsüogo.

Defence dak sendakba nung tenangzüktepba yangluba indang asüngdangba mapang China indang foreign ministry otongdar Mao Ning-i ashiba agi, linüktemi asetkongtem nükjiso aser autonomy akümtsübutsu aser tasembuba teloktem tejangraba anema inyaksangshi masütsü China-i imlar.

New Zealand Foreign Minister Winston Peters-i ashiba agi, iba missile tendangba ya par linüki kanga süoki ia bilemer.

"Iba amala inyakyim benoka inyakba atema mapang talangka nungi kanga süoki ia bilemba lemsatepa aruogo, saka China-i onok nem osang agütsüba sülen mapang tatsüka tsüngda tendangogo," ta Peters-i ashi.

"New Zealand-i iba ya magizüker. Onoki Pacific nung onok kidangertemi China-i South Pacific ya parnok missile capability tendangtsü atema tesem ka ama amshiba ya magizükdaktsüner," ta pai ashi.

Japan sorkaria, missile tendangtsüba indang osang parnokia agizükogo aser China dang iba inyakyim ya asadangshitsü atema mepeshia metetdaksüogo, ta ashi.

"China military inyakyim tali küma aoba indang süoki ia bilemba onoki lemsatepogo," ta Tokyo-i ashiba den, China nungner ketdangsürtemi anüng nungi janatem Japan indang exclusive economic zone (EEZ) nung tsüoktsü akok ta Japan indang Coast Guard nem Deobarnü osang agütsüogo, ta ashi.

Kyodo news agency-i Hombarnü sangdong ka ajanga ashiba agi, missile ya Japan indang EEZ tema nung tsüka liasü.

Missile tendangba mapang parnok indang tayimtsü mesüra rong raksaba indang osang kecha agizüka mali, ta Chief Cabinet Secretary ?Minoru Kihara-i osangbenertem den sensaksemba mapang ashi.

Parnok meketa aliba linük balalai parnok aitsüba indang telangzüba agütsüba mapang Mao-i, missile ya inyakyim sülen shitak anidaka teküzmükba kübok tendangogo.

"Ken o dak sendaka aliba linüktemi mashi mangatettsü imlar," ta lai ashi.

China-i tzüyimleni aibenbo long-range missile tem khaketa meyoker. China-i tatemsa intercontinental ballistic missile ya 2024 küm tendang, aser iba ajanga linük military tashi taitba akümba sayua liasü.

China-i parnok meketa aliba tesemtem nung military inyakyim tali benoka inyakba mapang tang iba missile tendangogo. Taiwanese security ketdangsür kati Hombarnü ashiba agi, Russia den drill densema military exercise balala ayongzüka agiba mapang Taiwan-i China navy senzüsenpong kanga junga asadangdar.

Office of the
Longkum Riju
Mokokchung, Nagaland

Longkhum Village Council tenüng nung 6th July 2026 anogo Longkumbo dak sendakba ken-o koba osang kaketterem nung adoktsü, yamai meyiptsür aser Longkum Riju-i kenyongi magizüker.

Arju yimli nung Arju kati koba telemtetba agir, ibaji tatembang, Arju kati mesüra telok balalai tangar Arju kati teka aitsü makok.

1. Imenba (Sami)	7. Nungsangmeren (Tukong)	13. Mayangtetba (Tar)
2. Tongpang Jamir (Sami)	8. Alemnungsang (Tukong)	14. Imtilepzuk (Tar)
3. Mayangmeren (Sami)	9. Ngangnenmeren (Tukong)	15. Imkummongba (Tar)
4. Esenner (Tatem)	10. Nokrenjungba (Tukong)	16. Tawatamsu (Tar)
5. Zulutemjen (Tatem)	11. Rongsenchiba (Tukong)	17. Imtimerang (Tar)
6. Limatongzuk (Tatem)	12. Sosangwati (Tar)	18. Takanungba (Tar)

AO RIJU SANGDONG

Ao Riju-i (Ao Academy) achaayanga agiba Arangtet Tatidang (AT) 2026 tanabubaren atema Chiteni 15, 2026 anogo nungi Shiyim (Form) tekübok agüja aliba tesemtem nungi angutsü.

ii) Wb. Aotemjen Jamir : M/No. 8731821467 (Kohima)

iii) Wb. P. Alem Jamir : M/No. 7005501457 (Dimapur)

iii) Ao Riju office : M/No 9089816427 (Mokokchung)

Agüja aliba tesemtem nung meinyaktetbapurtem ajak office den tongtepratepa inyaktsü mepishir. Iba Arangtet Tatidang nüng zülü Luroi 20, 2026 anogo tashi alitsü.

Sd/-
Rev. Prof. Rongsen Lkr
Chairman

Sd/-
(S. Wati özükü)
Secretary

Khamenei asüpila sentong nung mangyimer-i mangayangtsü ayimten

Tehran, Chiteni/July 06 (Agencies): Iran nungner meyirijang aika Tehran nung Hombarnü adenshia par lenir asür Ayatollah Ali Khamenei atema asüpila sentong nung shilem agia liasü.

State television nung drone agi tangokba footage sayuba nung nisung meyirijang aika central Tehran nung adenshia aliba nguogo.

Ayatollah Ali Khamenei aser par kinunger pezü indang tasü mang süngden tem gari tuluka nung inoker yimtung süa bener jaja aser nüburtem mokongdaktsütsü mechi azüklen nungi fire hoses ajanga tzü khalokja liasü.

Parnok apu ka ajanga aoba mapang mangyimer temi azüklen billboard ka nung US Tir Donald Trump indang tekolak nung injang ka khaloktsütsü ama yanglua alodak mangyimer temi long agi ona liasü.

"US-i özü tebu tepset. Onoki na metoktsütsütsü!" ta zülua liasü. Nüburtemi US aser British nungner nisan tem mi agi rongdok aser tetsür temi süoshi tanak agir placards amer liasü, kong English agi "TRUMP TEPSETANG" ta tanak agi zülur liasü.

Kari Trump, Vice President JD Vance, Defense Secretary Pete Hegseth mesüra Israel Ato Kilonser Benjamin Netanyahu indang noksa tem amer liasü, aser noksa shia prangbong indang crosshairs keter "Azü alitsü," ta zülua liasü.

Telok tulubai Iran nungner nisan aser banners sentsü temerem amer Khamenei mangayangtsü ayimtena liasü.

Deobarnü Tehran nung sarasademba hall tuluka nung Khamenei indang tasü mang süngden anasa par jabaso asem-i sarasadem, saka Iran

indang supreme leader ama pa melensang par jabaso Mojtaba Khamenei meliasü.

Tebu tepsetba mapang pa kanga mejungi yirutsü südi ta amanger aser February 28 nü Israel aser US nati tayimtsü amshia Iran maka rara tenzükb sülen Mojtaba Khamenei yimjak nung mangur.

Khamenei, par jala ka aser lar jala ita 14 tanur ka, par apang ka aser Mojtaba kinungtsü tasü mang süngden Hokulbarnü Iran ketdangsür aser bendanger tongtipang nisungtem asoshi bener arua yutsüba sülen mangyimba sentong tenzük.

Tan hopta parnok tasü mang ya Iran indang Shi'ite asoshi temeshi Qom yimtsü aser kidanger Iraq nung Shi'ite yimti anati bener aotsü aser iba sülen Iran-i meyiba bener arua Mashhad nung aremstü ta ashir.

Taoba ita preliminary peace agreement ka ajanga rara tembangogo aser Iran indang putir lenirtem yimsüsüba menden nung yutsü aser takok nguogo ta parnoki jembir.

Trump-ia iba rara nung takok nguogo ta ashir, ajisüaka rara tenzükdang Iran indang nuclear aser missile samatsütsü pa nükjidong lir ta sangdongba ama meinyakteti kidanger linüktem ang maktettsüa tashi agütsüogo.

Asüpila sentong alima atema Iran den yimjung ken o jembiba hopta ka agi menur, ta Trump-i hopta tatemlen ashi.

Kasa mapang Israel indang defence minister Israel Katz-i ashiba agi, Khamenei-i anir Israel samatsütsü sentong ka yangluba ajanga pa tepset.

"Iran lenir shibai Israel samatsütsü sentong yangludir, parnokkia tepsettsü," ta Katz-i ashi.

World Cup: Norway-i Brazil tsükdakja quarter-final tongogo



FIFA WC Round of 16 asaya nung Norway-i Brazil madak takok ngur pelateper.

Chiteni/July 6, 2026 (Agencies): New York New Jersey Stadium nung Erling Haaland-i asaya tanabuba shilem nung Norway atema goal ana idakja parnoki Brazil iba asayamung nungi tsükdaktsüogo.

Haaland-i minute 79 aser 90buba nung goal ana idakja Norway goal 2 agi tejakdang toktsü, saka minute 90+10buba Neymar-ia penalty ka ajanga Brazil atema goal ka idaktsü. Ajisüaka Brazil asoshi goal tanabuba idaktsütsü atema mapang maliasü.

1990 nungi tang tashi nung Brazil team FIFA World Cup ka nung danga Round of 16 nung metsüki aliba taküm tsükogo. Kasa mapang nung Norway pur tang mezügbuba quarterfinals nung asayatsü lir.

Deobarnü Haaland-i goal ana idaktsüba sülen pa taküm World Cup nung goal timtiba idaktsüba asayartem rongnung densemogo. Pai tang tashi nung goal tenet idakja Messi aser Mbappe den kasa kümogo.

Haaland dak alia goalkeeper Orjan Nyland-ia Norway atema

kanga junga asayaogo aser pai asaya mezügbuba shilem nung Bruno Guimaraes-i metsüba penalty ka kümzükbaba densema goal aitsü aliba ball tajung aika kümzükbago.

Brazil team ya tatemsa küm 36 tejakdang round of 16 nung Argentina-i goal 1-0 agi koker liasü. Estadio Azteca nung round of 16 asaya tanga ka nung England-i kanga meranga asayar goal 3-2 agi Mexico kokogo.

Asaya mezügbuba shilem nung Jude Bellingham-i goal ana idakja parnok ayong ayonga aküm saka iba sülen Mexico-i goal idaktsütsü asoshi attack süjen asüba menokdangpoine asayaba sülen England-i asaya koka parnok quarter-finals-i iogo.

Asaya tetenzük nungi Mexico-i goal idaktsütsü atema nongshia asaya, saka minute 36buba nung Saka-i agütsüba ball ka Bellingham-i tongokja parnok tejakdang aküm. Iba sülen mapang tatsüka dang lir Harry Kane-i agütsüba ball ka Bellingham-isa idakja parnok goal ana agi tejakdang aküm.

Ajisüaka Mexico nunger asayartemi maneni goal idaktsütsü atema meranga asaya aser asaya mezügbuba shilem metembang tsüngda Julián Quiñones-i parnok asoshi goal ka idaktsü.

Asaya tanabuba shilem nung Jesús Gallardo tetsüng nung ajemoktsüba atema Jarell Quansah nem red card ka agütsüba sülen England team asaya tanabuba shilembo asayar 10 agi dang asaya liasü.

Kanga meranga defend süa asaya aliba mapang ka nung Raúl Rangel-i box telung nung Anthony Gordon alangdaktsüba sülen penalty agütsü koba Kane-i idakja parnok maneni goal ana agi tejakdang aküm.

Maneni asaya nung ano Kane-i box telung nung Gutiérrez tetsüng nung metsüoktsüba VAR ajanga ngutetba sülen Mexico nem penalty ka agütsü, koba Jiménez-i idakja parnok nem timla agütsü. Mexico-i tasembuba goal idakja draw asütsü atema kanga meranga asaya saka magütsüteti England-i iba asaya koka liasü.



TESÜSABA ASAYA OSANG

Brazil	1	2	Norway
Mexico	2	3	England

ROUND OF 16

July 07	12:30 AM	Portugal	VS	Spain
July 07	5:30 AM	USA	VS	Belgium
July 07	9:30 PM	Argentina	VS	Egypt
July 08	1:30 AM	Switzerland	VS	Colombia

Neymar internationa football asaya nungi anisüngzüker



Chiteni/July 6, 2026 (Agencies): Tang asaya aliba FIFA World Cup 2026 Round of 16 nung Brazil-i goal 2-1 agi Norway makokba sülen Neymar-i international football asaya nungi anisüngzüker.

Arishi küm 34 tain asayar yagi Brazil atema tatembangbuba asaya nung goal ka idaktsür tang asaya nungi anisüngzüker.

Iba goal ya pa asoshi Brazil tenüng nungi 130 ben asayaba mapang goal 80buba liasü. Brazil asoshi tang tashi nung pai goal timtiba idaktsür lir aser iba den pai assist-a 59 sütsür lir.

"Ni kanga merangdangogo. Met Life stadium nung asaya tenzüker aser idaki tembanger," ta pai osangbenertem dang ashi.

Neymar-i arishi küm 18 asüba mapang 2010 küm August 10 nü Brazil atema MetLife Stadium nung mezügbuba goal idaktsü. Küm 16 sülen pai international goal tatembangbuba kasa tesem nung idaktsüogo.

Asayamung metenzük tsüngda Neymar Santos nungi asayaba mapang temola yiruba sülen pa Brazil squad nungbo liasü saka tetenzük nungibo khen danga masayai liasü.

Pa Deobarnü Norway den asaya nung asaya tanabuba shilem nung ai aser penalty ka ajanga Brazil atema goal ka ya idakja liasü.

Neymar ya Brazil nunger asayartem rongnung takok tajungtiba anguba asayar rongnung ka lir. Pai 2013 küm FIFA Confederations Cup akok aser 2016 Rio Olympic nung pai aniba team-i gold medal ngua liasü. Jurila jenjang nung pai Pelé ajateta Brazil nunger asayartem rongnung goal timtiba idaktsüba asayar aküm.

Ajisüaka pai FIFA World Cup mekokteti asaya nungi anisüngzüker.

Pa World Cup pezü asayaogo, saka 2014 küm yiru, 2018 küm junga masayatet, 2022 küm penalty shootout sülen tsük aser 2026 küm round of 16 nung tsükogo.

PCB-i Babar nem Test captain mapa tanaben agütsüogo



Chirteni/July 6, 2026 (Agencies): ICC World Test Championship nung tongtiba asayamung ana asayatsü lia Pakistan Cricket Board (PCB)-i Babar Azam nem national team Test captain mapa agütsüogo. Parnok West Indies aser England na den asayatsü lir.

ICC sangdong ka ajanga ashiba agi, Babar-i Shan Masood melenogo aser pa lenisüba nung Caribbean nung oa Test asayamung ka asayatsü aser iba sülen England den Test

asem asayatsü.

Pakistan team West Indies nung mezügbuba asaya July 25 nü tenzüksü aser tanabuba ya August ita tetenzüklen asayatsü. Iba sülen parnok Test asem atema England-i aotsü, koba August 19 nü tenzüksü.

PCB-i squad nung national team nungi khen danga masayai aliba asayar pezü shimogo. Left-arm spinner Ali Usman, batter Muhammad Awaiz Zafar, fast bowler Ubaid Shah aser wicket keeper - batter Muhammad Ghazi Ghorinunger

shimogo.

Saud Shakeel England series atema shimogo, saka pa anema ali nung dang asaydaktsütsü.

West Indies Tests atema Pakistan squad: Babar Azam (captain), Aamir Jamal, Abdullah Fazal, Ali Usman, Azan Awaiz, Imam ul Haq, Khurram Shahzad, Mohammad Abbas, Mohammad Ali, Mohammad Rizwan, Muhammad Awaiz Zafar, Muhammad Ghazi Ghorin, Sajid Khan, Salman Ali Agha, Shan Masood, Ubaid Shah.

England Tests atema Pakistan squad: Babar Azam (captain), Aamir Jamal, Abdullah Fazal, Ali Usman, Azan Awaiz, Imam ul Haq, Khurram Shahzad, Mohammad Abbas, Mohammad Ali, Mohammad Rizwan, Muhammad Awaiz Zafar, Muhammad Ghazi Ghorin, Sajid Khan, Salman Ali Agha, Saud Shakeel (subject to fitness), Shan Masood, Ubaid Shah.

BILEMDANGANG

"Tajung tamajung ajak nai inyakba yari meyipa arutsü."